



«ԻՆՏԵՐԱԿՏԻՎ ԿՐԹՈՒԹՅԱՆ
ԶԱՐԳԱՑՈՒՄ»
ՀԻՄՆԱԴՐԱՄ



ՀԵՐԹԱԿԱՆ ԱՏԵՍՏԱՎՈՐՄԱՆ ԵՆԹԱԿԱ
ՈՒՍՈՒՑԻՉՆԵՐԻ ՎԵՐԱՊԱՏՐԱՍՏՄԱՆ
ԴԱՍԸՆԹԱՑ 2022

ՀԵՏԱԶՈՏԱԿԱՆ ԱՇԽԱՏԱՆՔ

Թեմա՝ Կառուցողական մեթոդների կիրառման արդյունավետությունը
ուսուցման գործընթացում

Մասնակից՝ Լաուրա Գրիգորյան

Առարկա՝ Հայոց լեզու և գրականություն

Մարզ՝ Արմավիր

Դպրոց՝ Վաղարշապատի թիվ 12 հիմնական դպրոց

ԲՈՎԱՆԴԱԿՈՒԹՅՈՒՆ

1. Նախաբան	էջ 3
2. Գրական ակնարկ	էջ 4
3. Գործնական համատեքստ	էջ 6
4. Հետազոտական ընթացք	էջ 10
5. Ամփոփում	էջ 15
6. Գրականություն	էջ 16

ՆԱԽԱԲԱՆ

Սոցիալական նոր տեղաշարժերի և կրթական ոլորտի բարեփոխումների այս ժաանակաշրջանում դպրոցը կոչված է դաստիարակելու հասարակության կարիքներին համապատասխան գիտելիքներով և հմտություններով, համամարդկային և ազգային արժեքներ կրող մարդ և քաղաքացի: Այս նպատակի իրագործման առաջին քայլը ուսուցման որակի բարելավումն է, քանի որ միայն համակարգված և խորը գիտելիքները կարող են վերաճել կարողությունների և հմտությունների: Բնարկե, ուսուցիչները գիտակցում են, որ ուսուցման ավանդական ձևերով անհնար է հասնել ցանկալի արդյունքի, սակայն նորի կիրառումն էլ պետք է նպատակային լինի. դպրոցում լայն կիրառում գտած խմբային աշխատանքը հաճախ սահմանափակվում է խմբերի ստեղծումով և չի պարունակում համագործակցության տարրեր: Կրթական նոր պրակտիկայի՝ ուսուցման կոլեկտիվ եղանակի կայացման հիմնախնդիրները և դժվարությունները պայմանավորված են նաև այն հանգամանքով, որ «գոյություն ունեցող բազմապիսի կառույցները, գիտակցաբար կամ անգիտակցաբար, աշխատում են իրեն սպառած ուսուցման խմբային եղանակի պահպանման համար: Սկզբունքորեն դա բնական է: Երբ խոսքը ոչ թե մասնավոր նորարարական հնարքների կամ ռացիոնալիզատորական հայտնագործությունների մասին է, այլ ուսուցման պատմահասարակական նոր եղանակի գիտականորեն հիմնավորված տեսլականի, ապա հանրային գիտակցության ոչ չարամիտ դիմադրությունն անխուսափելի է»:¹

¹ Կառուցողական կրթության հիմունքները, Այոեքս, 2004, էջ 56-60:

ԳՐԱԿԱՆ ԱԿՆԱՐԿ

Պատկերացումն այն մասին, որ ուսուցիչը աշակերտների համար միայն տեղեկատվության աղբյուր է, արդեն չի բավարարում: Ուսուցչի դերը այլ նշանակություն է ձեռք բերում, մասնավորապես՝ աշակերտներին ուսուցչի գործունեության ոլորտի օբյեկտից հարկավոր է փոխարկել ուսումնական նյութի յուրացման համար անհրաժեշտ և սեփական գործունեության ոլորտի սուբյեկտի, որովհետև աշակերտի ուսուցումը և զարացումը կատարվում է միայն նպատակաուղղված ուսումնական գործունեության ընթացքում:

Կարծում եմ, անհրաժեշտ է, որ ուսուցիչը վերանայի և վերափոխի իր ուսումնական գործունեությունը և իր աշխատանքը կազմակերպի կառուցողական մեթոդներով: Կառուցողականությունն ինքնակարգավորող գործունեություն է, որի գաղափարական հենքն այն է, որ ուսումնառությունը պասիվ (կրավորական) գործընթաց չէ, ոչ էլ սոսկ ընդօրինակում կամ յուրացում, այլ ակտիվ գործընթաց, որն ապահովում է նոր գիտելիքների ձեռքբերումը՝ խարսխվելով սովորողի գիտակցության մեջ արդեն ձևավորված նախկին գիտելիքների վրա:

Ուսումնառության կառուցողական մեթոդները սովորողին օգնում են յուրացնել տեղեկությունները և վերաձևակերպել կամ վերափոխել դրանք, որոնք կօգնեն ստեղծելու կիրառելի մի համակարգ, որը հնարավորություն կտա փորձարկելու այս նոր մետեցումները և համոզվելու, որ ուսուցիչը ոչ թե սոսկ տեղեկություններ հաղորդող և վերահսկող է, այլ միջնորդ սովորողների ու միջավայրի միջև:

Կարելի է ներկայացնել կառուցողական ուսումնառությանը վերաբերող մի քանի ընդհանրացումներ կամ դրույթներ:¹

- Կառուցողական մեթոդներով աշխատող ուսուցիչը ընդունում և խթանում է սովորողների ինքնուրույնությունն ու նախաձեռնողականությունը:

¹ Կառուցողական կրթության հիմունքները, Այոեբս, 2004, էջ 56-60:

- Կառուցողական մեթոդներով աշխատող ուսուցիչը փոխներգործուն, մանիպուլյատիվ և ֆիզիկական միջոցներին զուգահեռ կիրառում է չմշակված, նախնական տվյալներն ու սկզբնաղբյուրները:
- Առաջադրանքը ձևակերպելիս ուսուցիչը կիրառում է ճանաչողական եզրաբանություն, օրնակ՝ «դասակարգել», «կանխատեսել», «ստեղծել», «վերլուծել» և այլն:
- Ուսուցիչը թույլ է տալիս, որ սովորողներն իրենց պատասխաններով ուղղորդեն դասը, վերափոխեն դասավանդման ռազմավարությունները, մեթոդներն ու դասի բովանդակությունը:
- Ուսուցիչը որևէ գաղափարի, հասկացության մասին սեփական պատկերացումներն սովորողներին հասցնելուց առաջ նախ պարզում է տվյալ հասկացության մասին սովորողների գիտելիքներն ու կարծիքը:
- Ուսուցիչը խրախուսում է սովորողներին երկխոսության մեջ մտնել թե իր և թե միմյանց հետ:
- Ուսուցիչը խրախուսում է հարցադրումները՝ սովորողներին առաջարկելով բովանդակային և բաց հարցեր, ինչպես նաև դրդում է նրանց՝ հարցեր ուղղելու համար:

Փոխակերպումները տեղի են ունենում նորհասկացությունների գոյացման ճանապարհով, իսկ դրանց գոյացումը ենթադրում է նախկին գաղափարների վերանայում: Յուրաքանչյուր նախկին փորձառություն մտածողության կառույցների կամ կաղապարային նմուշների հիմքն է կազմում: Ի վերջո, մենք կարող ենք իմանալ միայն այն, ինչ ի վիճակի ենք փորձարկել:

Այս մոտեցումը հատկապես կարևոր է Հիմնական դպրոցի ուսուցիչների համար, քանի որ Հիմնական դպրոցի աշակերտները ունեն հենքային գիտելիքներ, որոնց խորացումը կրերի նոր գաղափարների և գիտելիքների:

Հիմնական դպրոցի ամենօրյա աշխատանքի ընթացքում ուսուցիչներն առնչվում են բազմաթիվ խնդիրների՝ աշակերտների՝ նոր միջավայրում ադապտացիոն շրջանի հաղթահարումից մինչև ծրագրերի և դասագրքերում եղած ուսումնական նյութերի անհամապատասխանություն: Մեր խնդիրն է ներկայացնել, թե մայրենիի ուսուցման որակի բարելավման ուղղությամբ ինչ աշխատանքներ կարող է իրականացնել ուսուցիչը,

քանի որ մայրենին դպրոցական կրթության մեջ կարևորագույն տեղ է գրավում՝ լինելով և՛ ուսումնառության առարկա, և՛ մյուս առարկաների յուրացման միջոց:

ԳՈՐԾՆԱԿԱՆ ՀԱՄԱՏԵՔՍ

Վերջին տարիներին մեր դպրոցներում տեղ գտած քերականական կանոնների, սահմանումների, հոլովման ու խոնարհման հարացույցների սերտողական ուսուցումը արգելակում էր քերականական ձևերը խոսքում ճիշտ և նպատակահարմար կիրառելուն: Դասավանդման գործնական ուղղվածությունն ապահովելու համար լեզվական նյութի ուսուցումը պետք է պարունակի հատուկ տիպի բնագրեր, գործնական բնույթի վարժություններ, ինքնուրույն կերպով բանավոր և գրավոր խոսք կառուցելու հմտություններ:¹

Մյուս կարևոր պահանջը լեզվի գործածության կապակցումն է իրական հաղորդակցման տարբեր պայմանների հետ՝ կախված տվյալ իրադրությունից, խոսողի նպատակից, լսարանի առանձնահատկություններից:

Առարկայական նոր չափորոշիչների և ծրագրերի համաձայն նախատեսվում է լեզվական յուրաքանչյուր միավորի ուսումնասիրության ժամանակ ուշադրություն դարձնել նրա գործառական և ոճական արժեքին, համապատասխան վարժությունների միջոցով ամրապնդել դրանց գործնական կիրառությունը խոսքում:

Խոսքի մասերը, հոլովումն ու խոնարհումը նույնպես ուսուցանվում են ոչ միայն քերականական ձևավորման, այլև խոսքում գործնականորեն կիրառվելու առանձնահատկությունների և ոճական նպատակադրության տեսակետից:

Լեզվի ուսուցման հարցում այս մոտեցումները տարբեր ձևակերպումներով արծարծվել են հայ լեզվաբանության մեջ և դարերի ընթացքում միավորել են և ձեռք բերել նոր որակներ: Խ.Աբովյանի մանկավարժական սկզբունքները այն հենքն էին, որի վրա զարգացավ հայոց լեզվի գործնական ուսուցման տեսությունը:

Քերականության ուսուցումը գերազանցապես գործնական նպատակներ պիտի հետապնդի. Ոչ թե քերականություն քերականության համար, այլ քերականություն

¹ «Հայոց լեզվի առարկայական չափորոշիչներ»:

աշակերտի բանավոր և գրավոր խոսքի զարգացման համար: Ավելի քիչ քերականության սերտում, ավելի շատ ընթերցանություն, պատմողական խոսք, արտասանություն, գրավոր ու բանավոր շարադրանք, բառապաշարի ու ոճական հնարքների հարստացում: Լեզուն իբրև սուկ քերականական օրենքների ժողովածու ներկայացնելը պիտի համարել մեթոդիկայի այսօրվա ամենամեծ թերությունը: Գուցե կարիք կլինի քերականության դպրոցական ծրագրի բեռնաթափմամբ որոշ ժամեր տրամադրել ոճական վարժություններին, գրավոր ու բանավոր խոսքի զարգացմանը:¹

Հայ լեզվաբանության Մեծ երախտավորը կարծես նախանշում էր արմատական փոփոխությունների այն ճանապարհը, որը կօգնի ձևավորելու կյանքում կիրառելի գիտելիքներով ու կարողություններով օժտված անհատ:

Այս ընդհանրական պահանջները որոշակիացված են հայոց լեզվի և հայ գրականության առարկայական չափորոշիչներում և ծրագրերում:

Նյութական իմաստ արտահայտող խոսքի մասերի քննությունը (գոյական, ածական, թվական, դերանուն, բայ, մակբայ) Հիմնական դպրոցում կարևորվում է հատկապես կապակցված խոսքն ուսուցանելիս, լրատվական ժանրերն ուսումնասիրելիս, քանի որ նման կարգի աշխատանքների համար անհրաժեշտ են խոր լեզվաքերականական գիտելիքներ, բառերի ձևափոխություններով պայմանավորված քերականական և ոճական տարբերակման իմացություն:

Մեծ ուշադրություն է դարձվում նաև գործնական գրությունների իմացությանը, նրանցում գործածվող քերականական և կաղապարային ձևերի կազմությանն ու գրությանը:

8-րդ դասարանի ծրագրում ուշադրություն է դարձվում նաև արևմտահայերենի բառաքերականական իրողությունների քննությանը: Նման ուսումնասիրությունները նպաստում են համեմատության միջոցով վեր հանել հայոց լեզվի երկու տարբերակների՝ արևմտահայերենի և արևելահայերենի ոչ միայն բառային, այլև քերականական, կառուցվածքային ձևույթների տարբերությունները: Սովորողին հնարավորություն է տրվում այդ տարբերակման հիման վրա ընթերցել և մեկնաբանել արևմտահայերենով գրված տեքստերը, ինչպես նաև բարբառներով գրի առնված

¹ Գյուլբուդաղյան, Հայոց լեզվի դասավանդման մեթոդիկա, Երևան, 1978, էջ 56:

բանահյուսական նմուշները (հեքիաթ, առած, ասացվածք), կարողանալ վերարտադրել կարդացածը, պատրաստել որևէ գեկուցում կամ աշխատանք՝ սովորողներին ներկայացնելու նպատակով, խորացնել և ամրապնդել ձևաբանության լեզվական գիտելիքները, դրանցից օգտվելով՝ տարբեր բնույթի և ոճի տեքստեր կազմելու կարողություններ ձեռք բերել, կարողանալ կատարել տեքստերի ձևաբանական վերլուծություն՝ առանձնացնելով գոյականի և բայի հարացուցային ձևերը և բնութագրել դրանք, գրել թեստային աշխատանք գոյականի և բայի հարացուցային ձևերի վերաբերյալ:

Գոյականի, ածականի և մակբայի ոճական արժեքը (նաև կիրառության ոլորտը) խոսքում պարզելու համար նպատակահարմար է աշխատանք կատարել բնագրի վրա՝ գոյականի, ածականի և մակբայի մակդրային կիրառության վերաբերյալ:

12-րդ դասարանի ծրագրում սովորողների լեզվաքերականական իմացությունները պետք է դրսևորվեն վերլուծական շարադրություններում, տարբեր ոճերի կիրառումով և լեզվական նուրբ զգացողությունների ընկալմամբ կապակցված խոսքում, ռեֆերատներում՝ պահպանելով գիտական ոճի առանձնահատկությունները:

Արդեն ասվել է, որ խոսքի մասերի քերականական հատկանիշների ուսուցումն սկսվում է 7-րդ դասարանում: Հիմնական դպրոցում քերականական հենքային գիտելիքների ակտիվացման ճանապարհով ուսումնասիրվում է քերականական միջոցների ու կառույցների ոճական հնարավորությունները և նրանց դերը խոսքի կառուցման հարցում: Քերականական ոճաբանությունը պարզում է, թե լեզվում ինչ քերականական զուգահեռ ձևեր ու կառույցներ կան, ինչպես օգտագործել դրանք տեղին և նպատակահարմար:

Հիմնական դպրոցի ուսուցչի խնդիրն է մեթոդի ճիշտ ընտրությամբ գտնել համագործակցության ձևեր, խթանել աշակերտների՝ հետազոտելու, վերլուծելու, ստեղծագործելու և եզրահանգումներ կատարելու կարողությունները, զարգացնել նպատակահարմար խոսք կառուցելու ունակություններ:

Քերականորեն ճիշտ կառուցված խոսքը դեռևս ճշմարիտ չէ, եթե նրանում հաշվի չեն առնված խոսքային իրադրություններ և նրա բաղկացուցիչները: Խոսելու կամ գրելու ժամանակ կարևոր է իմանալ, թե առկա զուգահեռ ձևերից ու կառույցներից յուրաքանչյուրը խոսքի ինչ տեսակների և ոճերի է հատուկ, դրանցից որի գործածությունն

է տվյալ դեպքում ճիշտ և նպատակահարմար, որ դեպքերում են դրանք ազատ կերպով իրար փոխարինում, իմաստային ինչ նուրբ տարբերություններ է առաջ բերում տվյալ փոխակերպումը:

Հետազոտությունն իրականացրել էմ հետևյալ գործնական քայլերով.

Դասարանում սովորում են 30 աշակերտներ, որոնցից 10-ը չունեն բավարար նախագիտելիքներ և դժվարանում են որոշ թեմաների ուսումնասիրության ժամանակ:

1-ին դասաժամ - կազմել դասի պլան «Ածականի և նրա համեմատության աստիճանների ոճական կիրառությունը» թեմայով:

Պատրաստել անհրաժեշտ պարագաներ, նյութեր, քարտեր՝ գեղարվեստական գրականությունից բերված օրինակներով:

Իրականացնել խմբային աշխատանք Եռաթև, ԳՍՈԻ աղյուսակի, Վենի դիագրամի միջոցով:

2-րդ դասաժամ - կազմել դասի պլան «Անձնական դերանունների ոճական կիրառությունը» թեմայով:

Պատրաստել խմբային հետազոտություն՝ կիրառելով պրիզմա և մտքի քարտեզ մեթոդները:

3-րդ դասաժամ – կազմել դասի պլան «Բայի եղանակաժամանակային ձևերի ոճական հնարավորությունները» թեմայով:

Պատրաստել թիմային առաջադիմություն՝ քարտեզագրում, ԳՍՈԻ մեթոդներով:

ՀԵՏԱԶՈՏԱԿԱՆ ԸՆԹԱՅՔ

Քանի որ այսօր դպրոցում հայոց լեզվի դասավանդումը զուգակցվում է երկու կողմ՝ տեսական լեզվաբանական գիտելիքներ և լեզվի գործնական կիրառություն, շատ կարևոր է, որ հայոց լեզվի ուսուցիչը հստակ պատկերացնի իր գործունեության առաջնային նպատակները: Ելակետային է այն սկզբունքը, որի համաձայն առավելությունը տրվում է բուն լեզվի իմացությանը, այսինք՝ ճանաչողական, հաղորդակցվելու, համագործակցելու, ստեղծագործելու և ինքնուրույն աշխատելու կարողություններին, իսկ տեսական գիտելիքները կոչված են նպաստելու այդ կարողությունների զարգացմանը: Սակայն պետք է նկատի ունենալ, որ միայն համակարգված և խորը գիտելիքները կարող են վերաճել կարողությունների և հմտությունների:

Այդ պատճառով էլ հմուտ ուսուցիչը պետք է այնպես պլանավորի դասը, որ քերականական գիտելիքները նպաստեն աշակերտի լեզվի մաքրությանը, օգնեն ձևավորել կարողությունների արժեքների այն համակարգը, որը հասարակությունը ակնկալում է հանրակրթությունից:

Խոսքի մասերը նույնպես ուսուցանվում են ոչ միայն քերականական ձևավորման, այլև խոսքում կիրառվելու ու առանձնահատկությունների և ոճական նպատակադրության տեսանկյունից:

1-ին դասաժամ - Ածականի ուսուցումը կազմակերպեցի մի քանի հատկանիշներ ուսուցանելով միաժամանակ, նույն դասի ընթացքում: Այսպես, տեսական բացատրություններին հատկացնելով նվազագույն ժամաքանակ, համագործակցային ուսուցման եղանակով նյութը սովորեցրեցի աշակերտների միջոցով՝ նրանց գործնական աշխատանքների մղելով:

Խմբային աշխատանք – Դասարանը բաժանվեց 4 խմբի: 1-ին և 2-րդ խմբերի աշակերտները եռաթև աղյուսակի միջոցով ներկայացրին ածականի համեմատության աստիճանների նմանություններն ու տարբերությունները: 3-րդ և 4-րդ խմբերի

աշակերտները Վենի դիագրամի միջոցով ներկայացրին ածականի համեմատության աստիճանները: Այնուհետև բոլոր խմբերի հետ իրականացվեց քարտային աշխատանքը: Դասի վերջում աշակերտներն անհատական կազմեցին ԳՍՈՒ աղյուսակը:

Հիմնական դպրոցում որակյալ ուսուցում կազմակերպելու անկյունաքարը միջին դպրոցում ստացած գիտելիքների ակտիվացման միջոցով նոր համակարգված գիտելիքների ձեռքբերումն ապահովող կարողությունների և հմտությունների խթանումն է: Օրինակ՝ աշակերտները սահմանում են ածականը՝ որպես խոսքի մաս, միջին դպրոցում սովորած գիտելիքների հիմքի վրա, ապա վարժություններով հիմնավորում են սահմանումը:

Ուսուցիչը պետք է ուշադրություն դարձնի ուսումնական նյութերի ընտրության վրա. կարևոր է թեմային առնչվող հանձնարարությունները ձևակերպել գեղարվեստական խոսքի ընտիր նմուշների վրա: Ուսումնական բոլոր նյութերը (առաջադրանքների շտեմարաններ, բառարաններ, գնահատման սանդղակներ, վարժություններ, գրական-երաժշտական միջոցառումների ծրագրեր և այլն) ստեղծվում են ուսուցիչ-սովորող, սովորող-սովորող համատեղ գործունեության ընթացքում որպես համագործակցության արդյունք:

2-րդ դասաժամ - Անձնական դերանունների ոճական կիրառությունը: Դերանունները ցույց են տալիս կամ առարկա (սա, դա, նա) կամ հատկանիշ (այսպիսի, այնպիսի, այնպիսի), կամ թիվ (այսքան, այնքան, այդքան), կամ հատկանիշի հատկանիշ (այսպես, այդպես, այնպես), բայց չտարբերակված, ընդհանուր ձևով՝ ի տարբերություն գոյականների, ածականների, թվականների և մակբայների, որոնք տարբերակված առարկաների և հատկանիշների անվանումներ են:

Նյութական խոսքի մասերից գոյականը, դերանունը, բայը ձևաբանական տեսակետից բնորոշվում են նրանով, որ ունեն թեքման ձևեր, այն է՝ գոյականն ու առարկայական իմաստ արտահայտող դերանունները հոլովվում են, իսկ բայերը խոնարհվում են: Ժամանակակից հայերենում իրենց հիմնական գործածության ժամանակ թեքման ձևից զուրկ են ածականն ու թվականը, սակայն սրանք լեզվում հաճախ են հանդես գալիս գոյականական կիրառությամբ և այդ դեպքում հոլովվում են:¹ Այդ նպատակով կիրառել

¹ Գ.Ջահուկյան, Ժամանակակից հայոց լեզվի տեսության հիմունքները, Երևան, 1974, էջ 72:

եմ ուղղորդված պրիզմա մեթոդը: Դերանունների վերաբերյալ գիտելիքները ակտիվացնելու նպատակով հանձնարարվեց խմբերով ստեղծել մտքի քարտեզ, ներկայացնել անձնական դերանունների քերականական հատկանիշները: Խմբերը աշխատում են դասագրքով՝ նշումներ կատարելով փոխգործուն գրառումների համակարգով իրենց անհատական աղյուսակում:

Նյութական խոսքի մասերի ուսուցման կարևոր հարցերից է խոսքի մասերի փոխանցումը. կարևոր է, որ աշակերտները ընկալեն, որ խոսքիմաստային կարգերը մեկընդմիջտ տրված քարացած կարգեր չեն: Լեզվի զարգացման ընթացքում բառը մի խոսք մասից կարող է անցնել մյուսին:¹

3-րդ դասաժամ - Քարտեզագրման միջոցով աշակերտները կատարեցին դիմավոր բայերի քերականական կարգերի քննություն: Դասարանը բաժանվեց խմբերի ըստ բայերի արտահայտած իմաստների (ֆիզիկական, մտածական, հոգեկան դրության, վիճակ, ընթացայնություն) և աշակերտները թվարկեցին բայեր մտազրոհի եղանակով և խմբաբեցին ըստ վերը նշված իմաստների: Խմբերը ներկայացրեցին իրենց քարտեզները: Նոր գիտելիքներ ձեռք բերելու աշակերտի հնարավորությունը մեծապես կախված է այն բանից, թե գիտելիքների նախնական ինչ պաշար ունի աշակերտը: Մեր գիտելիքների պաշարը պահեստավորվում է երկարատև հիշողության մեջ: Այն աշակերտները, ովքեր ունեն գիտելիքների հարուստ պաշար, ավելի շատ բան կարող են վերցնել նոր ուսուցանվող նյութից:

Մեր կրթական համակարգը վազք է կրթական ծրագրի հետևից, ինչի պատճառով աշակերտները չեն հասնում խորքային գիտելիքներ ձեռք բերել: Այս առումով, որպեսզի աշակերտները ունենան մնայուն գիտելիքներ, պետք է ուսուցանվող նյութը կրկնելու, ամրապնդելու, կիրառելու, կապակցելու հնարավորություններ ընձեռվեն: Ընդ որում՝ դա պետք է արվի կանոնավոր և շարունակական ձևով: Այլ կերպ ասած՝ պետք է կարևորել ոչ միայն ուսումնական ծրագրի ընդգրկումը, այլև խորությունը:

Հետազոտության արդյունքները ցույց տվեցին, որ ցանկացած թեմայի համակարգված ուսուցումը ենթադրում է առանձին դասաժամերի բովանդակային շարունակական

¹ Մ.Ասատրյան, Ժամանակակից հայոց լեզու, Երևան, 1983, էջ 42:

ամբողջականություն: Այս առումով թեմաների ուսուցումը կարելի է արդյունավետ կազմակերպել կառուցողական մեթոդների կիրառմամբ:

Նրանք նպաստում են սովորել սովորելու կարողունակության զարգացմանը, երբ աշակերտներն ինքնուրույն և մյուսների հետ համատեղ արդյունավետ սովորում և աշխատում են կյանքի տարբեր իրավիճակներում: Նրանք ճանաչում են իմացածի և չիմացածի սահմանները: Աշակերտները ինքնակազմակերպվում են և ձևավորում են ժամանակի արդյունավետ կառավարման հմտություն: Նրանք կարողանում են գնահատել սեփական և մյուսների ֆիզիկական ու հոգեբանական հնարավորությունները, սովորում են աշխատել ծանրաբեռնվածության պայմաններում: Սովորելու ընթացքում աշակերտները ձևավորում են իրողությունները քննադատաբար և բազմակողմանի ուսումնասիրելու, վերլուծելու, ինչպես նաև ստեղծագործական ու նորարար մոտեցումներ կիրառելու ունակություններ: Սովորողները ձևավորում են համակարգային և ինտեգրված մտածողություն:

Կազմակերպման տարբեր եղանակներով տարատեսակ առաջադրանքներ կատարող աշակերտները բնականաբար չեն կարող միաժամանակ ավարտել իրենց աշխատանքը: Շատ ուսուցիչներ վախենում են նման դեպքերում առաջացող «անգործության ընդմիջումներից»: Կառուցողական մեթոդով աշակերտներին հանձնարարություններ տալը, կանխում է աշակերտների անգործ մնալը և այդ ընդմիջումները նրանք լրացնում են իրենց ունակությունները զարգացնելուն ուղղված աշխատանքով կամ օգնում են նրանց հետ չմնալ:

Վերլուծելով ստացված տվյալները կարող ենք փաստել, որ հետազոտության ընթացքում աշակերտների մոտ նկատվում է հետաքրքրություն առարկայի նկատմամբ, նրանք ավելի մոտիվացված են և անհամբերությամբ սպասում են հաջորդ դասին իրականացվելիք հետաքրքիր աշխատանքներին: Դրա հետևանքով նրանք ավելի պատրաստ են գալիս դպրոց՝ ապահովելով իրենց զիտելիքների ցուցադրումն ու ակտիվ մասնակցությունը:

Հիմնվելով հետազոտության արդյունքների վրա կարող ենք կազմել աշակերտների հետաքրքրությունների և ստացած զիտելիքների համեմատության սանդղակը:



Հետազոտության ընթացքը հիմնված էր համագործակցային խմբային աշխատանքների վրա: Յուրաքանչյուր խումբ (նախօրոք ձեռք բերված համաձայնությամբ) մյուսներին որևէ հարց էր ուղարկում, իսկ վերջիններս նրանց էին ուղարկում դրա ճիշտ պատասխանը: Այդպիսով խմբերն ինքնաստուգում էին իրականացում:

Ուսուցման համագործակցային եղանակներից յուրաքանչյուրն իր կիրառությունն ունի, քանի որ դրանցից յուրաքանչյուրը կարող է կիրառվել տարբեր իրավիճակներում:

Ելնելով հետազոտության արդյունքներից ուսուցման եղանակն ընտրելիս պետք է հաշվի առնել՝

- աշխատանքի համար հատկացված ժամանակը,
- վարժությունների տեսակները,
- դասերի տեսակները,
- բովանդակությունը,
- փոխկախվածության աստիճանը:

ԱՄՓՈՓՈՒՄ

Սույն աշխատանքում նախ փորձել եմ անդրադառնալ 21-րդ դարի դպրոցաշինության խնդիրներին, դրանցից բխող ուսուցման նոր մոտեցումներին և մեթոդներին:

Դպրոցը հասարակական կյանքի այն բնագավառն է, որն ամենից շատ է ենթակա փոփոխությունների ու տեղաշարժերի:

Մեր ընտրած թեման (Նյութական և թեքվող խոսքի մասեր) լեզվի ամենագործածական բաժիններից է, քանի որ առանց ձևաբանական կառույցների հնարավոր չէ կապակցված խոսք կառուցել: Թեմայի ուսումնասիրությունը հնարավորություն է տալիս ճանաչելու լեզվական այլընտրանքային ձևեր, որոնք ունեն ոճական արժեք:

Բառերի ձևափոխությունների բազմազանությունը պատմական զարգացման հետևանք է, որի ընթացքը նույնպես լեզվական ուսումնասիրության նյութ է:

Թեքվող խոսքի մասերը դրսևորում են նաև անկանոնություն և այլաձևություն, որը նույնպես պատմական զարգացման հետևանք է: Հետաքրքիր է ուսումնասիրել նաև ածականի, գոյականի, թվականի, բայի (դերբայ) և մակբայի հատկանշային գործածությունը և նրանց ոճական կիրառությունները:

Հենց այս նպատակադրումով էլ մենք կարևորում եմ ձևաբանության բաժնի, մասնավորապես նյութական խոսքի մասերի ուսուցումը:

Ինչպես այս բաժնի, այնպես էլ ողջ քերականության ուսուցման գործին նպաստում են համագործակցային ուսուցման ձևերն ու մեթոդները, որոնք փորձել եմ կիրառել ներկայացրած դասերում:

Կարծում եմ՝ քերականության դասավանդման մեթոդիկական դեռևս չուսումնասիրված և չբացահայտված խոսքեր ունի, որոնք կարիք ունեն մանրակրկիտ քննության:

Իմ կարծիքով հմուտ ուսուցչի խնդիրներից մեկն էլ այն է, որ թափանցի այդ խորքերը և նորագույն մեթոդների ու մեթոդական հնարների կիրառման և սեփական ստեղծագործական մտքի շնորհիվ նպաստի մայրենիի գործնական ուսուցմանը,

սովորողների հաղորդակցման կարողությունների և ունակությունների զարգացմանը, նրանց մղի ստեղծագործական գործունեության, ձևավորի նրա արժեքային համակարգը, որի արդյունքում կդաստիարակվի բարձր գիտելիքներով և համամարդկային արժեքներ կրող մարդ և քաղաքացի:

ԳՐԱԿԱՆՈՒԹՅՈՒՆ

1. Ջահուկյան Գ. «Ժամանակակից հայոց լեզվի տեսության հիմունքները», Երևան, 1974:
2. Գյուլբուդաղյան Ս. «Հայոց լեզվի դասավանդման մեթոդիկա», Երևան, 1978:
3. Ջահուկյան Գ. «Ոճաբանություն», Երևան, 1998:
4. Ասատրյան Մ. «Ժամանակակից հայոց լեզու», Երևան 2002:
5. «Կառուցողական կրթության հիմունքները», Այոեքս, 2004
6. «Ուսուցման ժամանակակից մեթոդներ, հնարներ, վարժություններ», Կրթության ազգային ինստիտուտ, 2008:
7. Միջնակարգ կրթության պետական չափորոշիչ:

